

Polazeći od ciljeva i načela utvrđenih Statutom SDA i Programskom deklaracijom Sedmog Kongresa SDA, u nastojanju da politički dosljedno odgovorimo na aktualna pitanja koja se tiču očuvanja tekovina odbrane BiH od agresija u periodu 92-95. i pitanjima statusnih prava boračkih kategorija, Sedmi Kongres SDA je 14. septembra 2019. godine, u Sarajevu, usvojio:

REZOLUCIJU

O OČUVANJU TEKOVINA ODBRANE BIH OD AGRESIJE U PERIODU 92-95. I PITANJIMA STATUSNIH PRAVA BORAČKIH KATEGORIJA

I

Polazeći od historijskog značaja odbrambeno-oslobodilačkog rata za opstojnost i kontinuitet državnosti Bosne i Hercegovine od 1992. do 1995. godine;

Duboko svjesni istinskih potreba boračkih populacija i realnih mogućnosti države;

Izražavajući odgovornost za socijalni položaj svih žrtava agresije na Bosnu i Hercegovinu;

Prihvatajući realizaciju ciljeva i načela Povelje Ujedinjenih naroda, Univerzalne deklaracije o ljudskim pravima, te Evropske konvencije o zaštiti ljudskih prava i temeljnih sloboda i njezinih protokola kao i načelima Ustava Bosne i Hercegovine;

SDA će nastaviti dosljedno i trajno zalaganje za očuvanje tekovina odbrambeno-oslobodilačkog rata, kao i borbu protiv pokušaja iskrivljivanja istine, historijskih i sudski utvrđenih činjenica, te izjednačavanja krivice.

Istina o agresiji na Bosnu i Hercegovinu, koja je utvrđena brojnim rezolucijama Savjeta sigurnosti UN-a i presudama Međunarodnog suda pravde i Haškog krivičnog tribunala se pokušava ugroziti od političkih snaga koje su vršile agresiju i njihovih sljedbenika. Cilj je izjednačiti strane i na taj način ostvariti podjelu Bosne i Hercegovine.

Tome doprinose i aktivnosti pojedinih struktura bh. pravosuđa koje konstruiraju optužnice protiv branilaca Bosne i Hercegovine, a ne procesuiraju brojne inspiratore, organizatore i izvršioce masovnih, sistemski i sistematski izvršenih zločina od strane agresorskih vojski.

Smatramo da je stoga neophodno, u okviru Instituta za istraživanje zločina protiv čovječnosti i međunarodnog prava koji djeluje pri Univerzitetu u Sarajevu, formirati poseban odjel za istinu i pravdu. Aktivnosti na tom planu su započete, a zadatak navedenog odjela bi bila borba protiv svih devijacija prisutnih u procesu tranzicijske pravde.

II

Odlučni smo u nastojanjima da u oblasti boračko-invalidske zaštite osiguramo dostignuti obim prava i pravičan status boračkih populacija u skladu sa njihovim potrebama i realnim

mogućnostima društva, kroz pravičnu kategorizaciju i materijalno osiguranje porodica šehida i poginulih boraca, ratnih vojnih invalida i demobiliziranih branilaca BiH.

Stranka demokratske akcije obavezuje se na rješavanje sljedećih prioriteta:

1. utvrđivanje jedinstvene politike donošenjem sistemskih propisa kojima se reguliraju osnovna socijalno-statusna pitanja i pravni položaj boračke populacije;
2. implementacija propisa kojima su regulirana prava ratnih i mirnodopskih vojnih invalida, porodica poginulih boraca, umrlih ratnih vojnih invalida, dobitnika najviših ratnih priznanja i demobiliziranih branilaca, maloljetnih dobrovoljaca i vojnih penzionera;
3. osiguranje stabilnih izvora i kontinuitet finansiranja zakonom propisanih i utvrđenih prava boračke populacije;
4. insistiranje da se zakonski propisana osnovica za određivanje visine mjesečnih primanja korisnika boračko-invalidske zaštite usklađuje sa procentom porasta troškova života;
5. nastavak podrške zapošljavanju i samozapošljavanju pripadnika boračkih kategorija kroz finansiranje projekata koji uključuju razvoj malih preduzeća i boračkih zadruga;
6. osiguranje nastavka djelovanja Fondacije za stambeno zbrinjavanje boračke populacije kroz zalaganje za osiguranje finansijskih sredstava za povoljno kreditiranje individualne stambene izgradnje, dok će putem institucija lokalne samouprave biti podržano finansiranje izgradnje stanova koji će boračkoj populaciji biti ponuđeni uz minimalnu cijenu stambenog prostora i pod povoljnim uslovima kreditiranja;
7. nastavak kontinuirane političke, pravne i finansijske podrške djelovanju Fondacije za pružanje pravne pomoći braniocima BiH sa nivoa općina, gradova, kantona, Federacije BiH i države BiH;
8. insistiranje na dosljednom procesuiranju svih odgovornih za ratne zločine, sve dok i posljednji ne bude izveden pred lice pravde, u okviru toga, posebno onih koji su obuhvaćeni procjenom Haškog tužilaštva i vraćeni bh. pravosuđu na procesuiranje (oko 850 predmeta sa oznakom A); ustrajavanje u namjeri da se usvoji Zakon o zabrani negiranja genocida;
9. zalaganje za potpun i tačan jedinstveni registar učesnika odbrambeno-oslobodilačkog rata i korisnika prava iz oblasti branilačko-invalidske zaštite, a sve u svrhu podizanja nivoa efikasnosti u postupcima izdavanja uvjerenja o podacima koji se vode u službenim evidencijama upravnih organa;
10. zalaganje da se zakonskim i podzakonskim aktima riješe statusna prava organizatora otpora u BiH;

11. poboljšanje položaja osoba s invaliditetom u zajednici, posebno kroz afirmiranje programa zdravstvenog zbrinjavanja kojim će biti pružena pomoć i podrška za prevazilaženje psihičkih trauma kompletne boračke populacije;
12. obuhvatanje kompletne boračke populacije projektima kojima će biti osigurano sagledavanje obima psiho-socijalnih problema, njihovo kategoriziranje, te evidentiranje posebnih potreba pojedinih kategorija korisnika kroz osmišljen program pomoći;
13. nastavak osiguravanja budžetskih sredstava za kontinuiranu nabavku i isporuku automobila za RVI 100 % I grupe;
14. nastavak brige o izgradnji, uređenju i održavanju spomen-obilježja i mezarja šehida i poginulih branilaca Bosne i Hercegovine, te stratišta nevinih žrtava rata, kao i očuvanju vrijednosti proisteklih iz odbrambeno-oslobodilačkog rata osiguravanjem podrške za obilježavanje značajnih datuma;
15. zalaganje da se na jedinstven način baštine tekovine antifašističke borbe 1941-1945. i odbrambeno-oslobodilačkog rata 1992-1995. godine;
16. podrška izradi zakonskih rješenja koje će osigurati racionalizaciju i efikasno zastupanje i predstavljanje različitih kategorija boračke populacije kroz reprezentativna boračka udruženja;
17. kontinuitet provođenja Zakona o kontroli zakonitosti korištenja prava iz oblasti boračko-invalidske zaštite i podzakonskih akata, što će osigurati da prava iz oblasti branilačko-invalidske zaštite budu usmjerena prema osobama sa najvećim doprinosom i stvarnim potrebama;
18. kontinuirano vršenje upravnog, finansijskog i inspeksijskog nadzora nad izvršenjem propisa kojima su regulirana prava boračke populacije.